




AWIG - AWIG

DESA ADAT BUGBUG



KABUPATEN KARANGASEM
B A L I

PIDAGING

MAKA BANTANG AWIG-AWIG DESA ADAT

	KACA :
MURDHA CITTA	1.
SARGA I. ARAN LAN WAWIDANGAN DESA.	1.
SARGA II. PATITIS LAN PAMIKUKUH.	2.
SARGA III. SUKERTA TATA PAKRAMAN	2.
Palet 1. Indik Krama	2.
Palet 2. Prajuru/ Dulun Desa.	4.
Palet 3. Indik Kulkul	7.
Palet 4. Indik Paruman	8.
Palet 5. Indik Druwen Desa.	10.
Palet 6. Sukerta Pamitegep.	12.
Kaping 1. Karang, Tegal miwah Bangket Desa.	12.
Kaping 2. Tanah Bangket Ayahan Desa.	14.
Kaping 3. Kekayonan	14.
Kaping 4. Wewangunan.	15.
Kaping 5. Wewalungan	15.
Kaping 6. Bhaya.	16.
Kaping 7. Ngerereh Taru muwah Baburon.	17.
Kaping 8. Panyanggran Banjar.	18.
Kaping 9. Daha Taruna lan Panyanggrannya.	19.
SARGA IV. SUKERTA TATA AGAMA	19.
Palet 1. Indik Dewa Yadnya.	19.
Palet 2. Indik Resi Yadnya.	24.
Palet 3. Indik Pitra Yadnya	24.
Palet 4. Indik Manusa Yadnya.	26.
Palet 5. Indik Bhuta Yadnya.	26.
SARGA V. SUKERTA TATA PAWONGAN.	28.
Palet 1. Indik Pawiwahan.	28.
Palet 2. Indik Nyapian	30.
Palet 3. Indik Santana.	32.
Palet 4. Indik Warisan Miwah Tetamian	33.
SARGA VI. WICARA LAN PAMIDANDA	35.
Palet 1. Wicara.	35.
Palet 2. Pamidanda	35.
SARGA VII. NGUWAH-NGUWUHIN DAGING AWIG-AWIG.	36.
SARGA VIII. P E N U T U P	37.

MURDHA CITTA

OM Awighnamastu nama siddham.

Sangkaning asung kertha wara nugraha Ida Sanghyang Parama Kawi, makaputusing paseban Krama Desa Adat Bugbug saha umenget ring sukertaning Sang mawisesa ring rat, prasida kasidan gumawe Awig-Awig Desa Pakraman maka sipat siku-siku pameneh. Lamakana wastu sidhaning don prayojanan mami kabeh sahananing pawongannya prasama angidepakena kadi linging Awig-Awig iki.

SARGA I

ARAN LAN WAWIDANGAN DESA

Pawos 1

1. Desa Pakraman puniki mawasta Desa Adat Bugbug.
2. Jebar kakuwub wawidangannya mawates nyatur utawi ngider bhuwana, luire :
 - a. Sisi wetan ring Banyu Biru utawi Er Bru (saking Batu Kowek utawi Ngampan Rempak kantos ke Apen Bias Putih).
 - n. Sisi kidul ring Ampwaning Segara (saking Apen kantos ka Batu Madeg).
 - c. Sisi kulon ring Cima (saking Batu Madeg kantos ka Sema).
 - r. Sisi lor ring Ngampan Rempak (saking Sema kantos ka Batu Kowek).

Pawos 2

Kakuwub wawidangan Desane manut dresta luire :

1. Papupulan karang paumahan sinanggah palemahan Desa Pakraman.
2. Setra, bangket miwah tegal ring kakuwub wawidangan Desane sejawaning palemahan Desa Pakraman manggeh telajakan Desa.

Pawos 3

Sahanan awig-awig, pararem-pararem miwah sahanan pasuaran Desane manggeh kajejerang ring kakuwub wawidangan Desa Adat Bugbug.

Pawos 4

1. Desa Adat Bugbug puniki kawangun antuk papupulan karang ayahan Desa, turmaning kapalih dados solas Banjar Adat, liure :
 - a. Banjar Puseh.
 - n. Banjar Bancingah.
 - c. Banjar Madya
 - r. Banjar Darmalaksana
 - k. Banjar Segaa
 - d. Banjar Celuk Kangin.
 - t. Banjar Celuk Kauh.
 - s. Banjar Dukuh Tengah
 - w. Banjar Baruna
 - l. Banjar Garia
 - m. Banjar Samuh.

2. Manut ring nunjuk-lungsuring cacah jiwa pawongannya, pah-pahan Banjare rauhing wates wawidangan palemahannya manut pamutus paparuman Desane.

Pawos 5

1. Banjare wenang ngardi awig-awig miwah pararem-pararem maka pamikukuhnya.
2. Awig-awig miwah pararem-pararem Banjare tan wenang lempas ring Awig-Awig miwah pararem-pararem Desane, saha teher kalingga-tanganin antuk Jero Bandesa miwah Kelihan Desa maka pamikukuhnya dumugi dados lumaksana.
3. Banjare patut madruwe piranti-piranti, pamekasnya Bale Banjar miwah kulkul.
4. Banjare patut madruwe tempekan " Daha-Taruna " manut pamutus paparuman.

SARGA II

PATITIS LAN PAMIKUKUH

Pawos 6

Desa Adat Bugbug ngemanggehang pamikukuh minakadi :

1. Pancasila.
2. Undang-Undang Dasar 1945, pamekas pasal 18.
3. Tri Hita Karana manut sada cara Agama Hindu.
4. Perda. Nomor 06 Tahun 1986.

Pawos 7

Luir patitis Desa Adat Bugbug minakadi :

1. Mikukuhang miwah ngerajegang Sanghyang Agama.
2. Nginggilang tata prawertine ma-Agama.
3. Ngerajegang kasukertan Desa saha pawongannya sakala kalawan niskala.
4. Ngajegang tata pangaskaraning pawongan, pamekas sane ngiket pakulawargan.
5. Ngajegang kasukertan saraja druwening Desa miwah pawongannya sami.

SARGA III

SUKERTA TATA PAKRAMAN

Palet 1

Indik Krama

Pawos 8

1. Sane kabawos Krama Desa Bugbug inggih punika :
 - a. Sahanan sang jenek mapumahan ring Desa Adat Bugbug saha ngamong ayahan Desa wiadin Banjar, miwah sane kantun nyungkemin Kahyangan Desa turmaning ma-Agama Hindu.
 - n. Sajaba punika kasinanggah tamiu.

Pawos 9

Krama Desa Adat Bugbug wenten petang pawos luire :

1. Krama Desa Ngarep (Krama Desa Satus Duang Dasa) ; puniki krama sane madruwe bangket ayahan Desa.
2. Krama Desa Sasah Abu ; puniki kulawarga sane sampun mapumahan utawi marabian sane nenten madruwe bangket ayahan Desa.
3. Krama Desa Balu Angkep ; puniki kulawarga balu sane pianaknyane sampun menek kelih.
4. Krama Desa Bulu Angkep ; puniki kulawarga sane katinggalan meme-bapa tur sampun menek kelih, luh-muani miwah muani-muani.

Pawos 10

Kawit dados Krama Desa :

1. Mawiwit antuk parabian.
2. Balu Angkep.
3. Bulu Angkep.
4. Mawiwit sangkaning jumenek ngarereh karya, turmaning malarapan saking patilar rahayu saking dura desa.

Pawos 11

Panemayan tedun makrama Desa :

1. Tigang sasih sesampune mabeya-kala utawi marebu.
2. Krama Balu Angkep yening pianaknyane sampun menek kelih.
3. Krama Bulu Angkep yening pianaknyane sampun menek kelih, kalih diri lanang-istri utawi lanang-lanang.
4. Tigang sasih saking ngawit jumenek mekarya.

Pawos 12

Sahanan Krama Desa miwah tamiu keni tategenan luire :

1. Krama Desa Ngarep keni ayah nyumek, mapiteges urunan miwah ayahan nyumek ritatkala wenten usaba miwah aci-aci mapahayu Desa.
2. Krama Desa sane tiosan (Krama Desa Sasah Abu, Krama Desa Balu Angkep, Krama Desa Bulu Angkep, Daha miwah Taruna) keni ayah nyanggra manut pararem.
3. Prade ritatkalaning ngayah sinalih tunggil krama tan tedun ngayah, wenang keni pamidanda manut pararem.
4. Prade rikalaning ngayah wenten sinalih tunggil krama kasepan tedun, utawi matilar sadurung puput karyane, wenang krama inucap keni pamidanda manut pararem.
5. Krama Desa sane ngemong karang ayahan desa, keni pitik miwah jinah bolong manut arah-arah Desa.

6. Tamiu sane jumenek magenah ring wawidangan Desa Adat Bugbug keni urunan sanunggil ngawarsa manut pararem.

Pawos 13

Krama Desa sajaba Krama Desa Ngarep, kadadosang :

1. Mamit (mapoangkid) utawi tan tedun :
 - a. Rikalaning mapwangun, ngeraabin, ngewangun karya utawi yadnya, nandur utawi mamulih, lan sane tiosan manut panglokikan Prajuru/Dulun Desa.
 - n. Macihna matepetin majeng ring rabi lan oka utawi waris saking kapurusan, wiadin malalungayan saking pituduh Sang Amawarat utawi pituduh Desa wiadin duk pamargi atagan punika sampun wenten sajeroning palungayan.
 - c. Kengin mapoangkid (mamit) wantah apisan, sajawaning wenten panugrahan saking Prajuru utawi Dulun Desa.
 - r. Sajeroning sungkan sane kamanggehang antuk sang wenang.
2. Nyada; mapiteges ngemademang ayah-ayah risampun mayusa nem dasa warsa utawi sangkaning macihna sungkan-sungkanan.
3. Nyuksukin, sane kawenangang risampun munggah daha-taruna utawi sampun mresidayang nganutin makrama.
4. Mamit, yening kajudi antuk Sang Mawarat utawi malalungayan selami tigang rahina rauh pitung rahina.
5. Mamit, riantukan sungkan ila, sungkan AIDS, buduh miwah sebacakannya.
6. Sang mamurug pawos puniki wenang keni pamidanda manut pararem.

Pawos 14

Wusan dados Krama Desa luire :

1. Krama Desa Ngarep wusan makrama Desa Ngarep yening bangket sane keni ayahan Desa punika sampun nenten kadruwe antuknya.
2. Sajawaning Krama Desa Ngarep, kengin wusan makrama Desa yening :
 - a. Mawiwit saking pinunas ngaraga, prade kesah kadura desa utawi ngalangkungin sagara, tur risampun polih ilikita lunga anghenes.
 - n. Kanorayang dwaning sampun tan prasida ngehehin solah, maprawerti setata nguwig kecaping Awig-Awig.

Palet 2

Prajuru / Dulun Desa

Pawos 15

1. Desa Adat Bugbug kaenter antuk Jero Bandesa, kasanggra antuk Kelihan Desa.
2. Banjar kaenter antuk Kelihan Banjar.

3. a. Jero Bandesa mawiwit saking Bandesa Mas, maka manggalaning yadnya ritatkala wenten usaba utawi aci-aci ring Desa Adat Bugbug, tur kasanggra antuk Krama Desa Ngarep sajeroning ngenterang kasukertan niskala.
- n. Kadegang malarapan antuk turunan manut kang sinanggah pinisepuh.
- c. Maduluran Dewa Saksi ring Pura Desa (Bale Agung).
4. a. Kelihan Desa Adat maka manggalaning pawangunan Desa, kasanggra antuk Paruman Nayaka Desa sajeroning ngenterang indik pangrencana, ngarincikang pari-indik parauhan miwah panelas prabea Desa Adat, miwah sane tiosan manut Tri Hita Karana.
- n. Kelihan Desa mawiwit saking Krama Desa sajabaning tamiu tur kacalonang antuk Paruman Krama Desa Ngarep lan Paruman Nayaka Desa, saha sapauningan Jero Bandesa.
- c. Kadegang malarapan antuk pamilihan olih Paruman Krama Desa Adat Bugbug nyabran 5 (limang) warsa, sajawaning wenten pari indikan sewos, tur kengin kapilih malih.
- r. Maduluran Dewa Saksi ring Pura Desa (Bale Agung).
5. a. Kelihan Banjar mawiwit saking Krama Banjar sowang-sowang.
- n. Kadegang malarapan antuk pamilihan nangken 5 (limang) warsa.
- c. Maduluran Dewa Saksi ring Pura Desa (Bale Agung).
6. Sahanan Prajuru patut :
 - a. Tan cedangga.
 - n. Tan macihna naen malaksana corah (naen mahukum rangkungan ring tigang warsa).
 - c. Wikan ngewacen lan nyurat aksara Bali miwah aksara Latin.
 - r. Manut ring pararem.

Pawos 16

Paruman Nayaka Desa :

1. Para Nayaka mawiwit saking Krama Desa Adat Bugbug.
2. Para Nayaka kadegang malarapan antuk pamilihan nangken 5 (limang) warsa, olih :
 - a. Krama Banjar ring sowang-sowang Banjar, satmaka wakil Banjar.
 - n. Krama Desa Bugbug Purantara satmaka wakil Krama Desa Adat Bugbug ring jaba Desa.
3. Sajaba punika taler kadegang malarapan antuk pituduh Kelihan Desa Adat manut pararem.
4. Swadarmaning Paruman Nayaka Desa :
 - a. Ngarencana pawangunan Desa Adat manut Tri Hita Karana.
 - n. Ngarencana indik pangerauhan (pioli-pioli) miwah panelas prabea Desa nangken ngewarsa.
 - c. Sareng ring Kelihan Desa Adat ngardi pararem miwah pamutus indik tata cara ngenter Desa Adat manut daging awig-awig puniki.

Pawos 17

1. Kelihan Desa Adat kasanggra antuk :
 - a. Patajuh miwah petangan pinaka wakil.
 - n. Penyarikan pinaka juru surat.
 - c. Patengen utawi Sedahan Raksa pinaka pangemong druwen Desa.
 - r. Patilik Desa pinaka panureksa padruwean Desa.
 - k. Prajuru Desa sane tiosan pinaka panyanggra manut wiguna.
2. Sajeroning ngenterang kasukertan niskala, Jero Bandesa misinggihang para Pinandita luire :
 - a. Pemangku utawi Pangempu Kahyangan Desa.
 - n. Buyut.
 - c. Kubayan.
 - r. Sedahan Desa utawi Balian Saha
 - k. Balian Gorok.
3. Ritatkala ngenterang pamargin aci-aci Jero Bandesa kasanggra antuk :
 - a. Rajeg Desa.
 - n. Pangenter aci-aci utawi pangenter adat.
 - c. Patilik Kanginan utawi Subak Taruna.
 - r. Patilik Kauhan.
 - k. Subak Daha.
 - d. Luput Desa.
 - t. Kasinoman.
 - s. Prawayah.
 - w. Undagi Desa.
 - l. Krama Ngarep.
4. Sajeroning ngenterang indik pawangunan Desa manut Tri Hita Karana Kelihan Desa Adat kasanggra antuk Paruman Nayaka Desa.

Pawos 18

1. Swadarmaning Jero Bandesa luire :
 - a. Ngemargiang tur nitenin pamargin Awig-Awig.
 - n. Maka manggalaning aci-aci Desa manut dresta.
 - c. Nuntun saha nyaksinin tata cara miwah sangaskaraning kahuripan manut sane ngilitang sulur pakulawargan.
 - r. Mawosin saha niwakang pamutus marep ring Krama Desa sajeroning Desa pakraman.
2. Swadarmaning Kelihan Desa Adat luire :
 - a. Waluya panunggalan warga desane sajeroning ngupadi daging patitis lan pamikukuh ngemanggehang dresta, agama, mahawinan prasida ngawakilin krama desa matemuang bawos ring sapa sira ugi.
 - n. Ngenterang pamargin daging awig-awig, pasuaran lan pararem Desa Adat.

- c. Nuntun saha nyaksinin tatacara miwah sangaskaraning kahuripan manut sane ngilitang sulur pakulawargan.
 - r. Mawosin saha niwakang pamutus marep ring krama desa sajeroning desa pakraman.
3. Prajuru Adat tiosan patut :
- a. Nyanggra, nyerainin Prajurune lianan.
 - n. Ngambil saha nureksain druwen Desa Adat antuk ilikita pastika, utawi pinaka pangemong druwen Desa Adat.
4. Prade Prajuru utawi Dulun Desa iwang pangelaksana patut keni pamidanda nikel ring kaiwangan krama tiosan, saha kangkat kararyanang manut pararem.

Pawos 19

Patuas utawi piolihi-olihi Prajuru utawi Dulun Desa luire :

- 1. Luput rarempon (wawijilan).
- 2. Polih bukti utawi patuas tiosan manut pararaem.

Pawos 20

- 1. Prajuru utawi Dulun Desa kagentosin riantukan :
 - a. Seda.
 - n. Wit sangkaning pikayun rahayu utawi pinunas ngeraga.
 - c. Kanorayang dwaning iwang pamargi miwah nilar sasana.
 - r. Pastika pangadegan limang warsa.
- 2. Kelihan Desa Adat kanorayang majalaran antuk pararem maka pamutusing paparuman Desa Adat tur kaingkipun antuk Krama Desa Adat sami.
- 3. Prajuru tiosan sane kajudi antuk Kelihan Desa kanorayang majalaran antuk ilikita pamutus saking Kelihan Desa Adat.

Palet 3

INDIK KULKUL

Pawos 21

- 1. Kulkul ring Desa Adat Bugbug, luire :
 - a. Kulkul Desa minakadi : kulkul tegteg (kulkul slaguwi), kulkul krama, kulkul Daha-Taruna, kulkul Paruman Nayaka.
 - n. Kulkul Banjar ring Banjar sowang-sowang.
 - c. Kulkul seka-seka utawi kulkul tempek.
 - r. Kulkul Pemaksan.
- 2. Tabuh tatepakan kulkul Desa luire :
 - a. Atuludan banban tengeran tedun ngayah.
 - n. Atuludan bulus tengeran kapancabhayan.

- c. Tigang tuludan banban tengeran nedunang Tarunan Desa.
 - r. Nem tuludan banban tengeran nedunang Dahan Desa Payas Ageng, Telung tuludan banban nedunang Dahan Desa Payas Alit.
 - k. Ping sia kalentungan maarang sia etangan tengeran patedunan Kasinoman.
 - d. Ping solas kalentungan maarang solas etangan tengeran patedunan Desa.
 - t. Kulkul tegteg (kulkul slaguwu) masuara tigang kalentungan banban prade wenten sinalih tunggil krama madruwe pianak buncing.
3. Tabuh tatepakan kulkul ring sowang-sowang Banjar utawi seka (tempek) luire :
- a. Atuludan banban tengeran tedun sangkep utawi ngayah.
 - n. Atuludan bulus tengeran kepencabhayan.

Pawos 22

1. Kulkul Desa utawi Banjar tan wenang katepak yan tan sangkaning pituduh Prajuru, sajawaning tengeran kapencabhayan.
2. Sang nepak yan tan sangkaning pituduh Prajuru, patut digelis atur supeksa maka buatan panepake, yan tan asapunika keni pamidanda manut pararem, asapunika taler keni pamidanda yan nepak tan manut wiguna.
3. Kulkul seka-seka utawi tempekan-tempekan kalih kulkul pondokan-pondokan tan kalugraha nyawerin utawi matehin sukat utawi tengeran kulkul Desa ; yan prade kapurug keni pamidanda manut pararem tur kulkul inucap kadaut antuk Desa.

Palet 4

INDIK PARUMAN

Pawos 23

1. Paruman utawi sangkepan ring Desa luire :
 - a. Paruman Desa kawentenang :
 - 1). Nyabran ngasasih majalaran antuk arah-arrah.
 - 2). Napkala (padgata kala) majalaran antuk arah-arrah manut tatujon.
 - n. Sangkepan Prajuru utawi Dulun Desa kawentenang manut wiguna.
 - c. Paruman Nayaka Desa kawentenang :
 - 1). Nyabran ngasasih manut daging Kalender Desa.
 - 2). Napkala (padgata kala) majalaran antuk arah-arrah manut tatujon.
 - r. Paruman Banjar kawentenang :
 - 1). Nyabran ngasasih majalaran antuk arah-arrah.
 - 2). Napkala majalaran antuk arah-arrah manut tatujon.

2. Paruman ring Desa utawi Banjar madudonan sekadi ring sor :

- a. Paruman Krama Desa Ngarep, prasida lumaksana risampun katedunin antuk sang patut ngamiletin, kamanggala antuk tengeran kulkul miwah sang manedunin patut mabusana madestar, makampuh matepi duang aneh, maumpal, tanpa kwaca saha ngangge keris pinaka saselet. Tan maren ngarcana ring Ida Bhagawan Panyarikan, maka sarana Widhi-Widhana marupa cane.
- n. Paruman Nayaka Desa miwah Paruman Banjar prasida lumaksana risampun katedunin antuk sang patut ngamiletin tur kamanggala antuk tengeran kulkul saha mabusana adat nyalempot miwah tan kalugra makta gagawan sakaluire. Tan maren ngarcana ring Ida Bhagawan Panyarikan, maka sarana widhi-didhana marupa cane.

3. Swadarmaning Paparuman :

- a. Pamuput babawos, briyuk sapanggul utawi ingkup puniki kamanggehang.
- n. Prade pidaging paparuman tan kaingkupin, Prajuru Dulun Desa wenang ngilikang babawos saha pamutusny manggda kararemin antuk Krama Desa. Bilih tan prasida kasungkemin jantos ping tiga, Prajuru Dulun Desa wenang nunas babawos ring Sang Mawarat.
- c. Tan kalugra ngawetuang suara gora utawi byota, yan wenten sane asapunika keni pamidanda bea pacamil kadi dandaning nguman-uman ring sabha.

Pawos 24

1. Sajeroning Paruman Desa, Jero Bandesa miwah Kelihan Desa Adat patut nyiarang indik pamargin ngenterang Desa pamekas ngenenin indik :
 - a. Munjuk lungsuring pakraman saha ayah-ayah, miwah sulur artha-brana druwen Desa.
 - n. Rencana Prajuru Dulun Desa ngeninin indik usaha Desa kapungkur.
2. Pamutus Paparuman Desa sinanggeh pararem maka pamitegep pamargin Awig-Awig.

Pawos 25

1. Paruman Prajuru Dulun Desa kawenangang wantah ngarincikang panglaksanaan usaha Desa kapungkur.
2. Paruman Prajuru Dulun Desa tan kawenangang ngeninin tategenan ring Krama Desa, sadurung kaingkupin antuk : Paruman Nayaka Desa miwah Paruman Desa.
3. Pamutus paparuman Prajuru Dulun Desa ngawetuang paswara maka pidaging pituduh Sang Mawarat utawi pidaging pararem Paruman Nayaka Desa miwah Paruman Desa.

INDIK DRUWEN DESA

Pawos 26

Padruwean Desa Adat Bugbug sekadi ring sor :

1. Kahyangan sane kaempon utawi kawawa antuk Desa Adat luire :

- a. Kahyangan Tiga minakadi :
 - 1). Pura Puseh.
 - 2). Pura Desa utawi Pura Bale Agung.
 - 3). Pura Dalem.
- n. Pura Ayung utawi Pura Sri.
- c. Palinggih Busali.
- r. Pura Piit.
- k. Pura Penyarikan.
- d. Pura Gumang utawi Bukit Juru.
- t. Pura Bukit Gundul
- s. Pura Bukit Pajinengan.
- w. Pura Cilidasa utawi Pura Candidasa.
- l. Palinggih Gunung Sari.
- m. Pura Bias Putih.
- g. Palinggih Bhatara Bagus Sakenan.
- b. Palinggih Bhatara Rambut Sedana.
- ng. Palinggih Bhatara Ayu Maospahit.
- p. Palinggih Bhatara Maspahit utawi Manjangan Saluang.
- j. Palinggih Bhatara Gede Galogor.
- y. Pura Prajapati.
- ny. Pura Pasujan.
- ā. Pura Pangalapan utawi Pura Ulun Suwi.
- ī. Pura Melanting.

2. Kahyangan sane kaempon antuk Krama Pemaksan, luire :

- a. Gaduh Palinggih Bhatara Lingsir ring Puseh.
- n. Pura Pasek.
- c. Pura Paswikan.
- r. Pura Babotoh.
- k. Pura Pamengkang.

3. Padruwean Desa Adat Bugbug sane marupa :

- a. Pratima-pratima.
- c. Catu piturun asiki.
- n. Prasasti Tembaga makweh dasa lembar.
- r. Genta Banjra piturun tatiga.

4. Wewangunan tiosan manut padruwean Desa.
5. Tanah-tanah tegak Kahyangan utawi Pura-Pura ring Desa Adat Bugbug, sowang-sowang malinggah apalebahan.
6. Tanah-tanah : tegal, bangket, Laba Pura, Setra manut padruwean Desa.
7. Tanah-tanah karang ayahan Desa.
8. Lelanguan miwah ilen-ilen druwen Desa luire :
 - a. Lelanguan miwah ilen-ilen druwen Desa luire :
 - 1). Gong Desa.
 - 2). Salonding.
 - 3). Gambang.
 - n. Lelanguan sane kasanggara antuk seka luire :
 - 1). Gong Kebyar.
 - 2). Gambang Saron.
 - c. Ilen-ilen walin Pura luire :
 - 1). Daretan wewalen.
 - 2). Rejang.
 - 3). Abwang masramanan utawi magagontelan.
 - 4). Papendetan.
 - 5). Dedarian.
 - 6). Solahan Ungkulan utawi Pajeng.
 - 7). Solahan Bhatara Sri.
 - 8). Solah Lente.
 - 9). Tatebahan.
 - r. Ilen-ilen panyanggra seka luire :
 - 1). Sanghyang.
 - 2). Joged Bumbung.
 - 3). Janger.
 - 4). Palalegongan.
 - 5). Gambuh utawi Gandrung.
 - 6). Calonarang.
 - 7). Arja.
 - 8). Cakepung.
 - 9). Gebug Ende.
9. Padruwean Desa Adat tiosan sane durung kaunggahang ring awig-awig puniki, manggeh kajejerang manut pararem.

Pawos 27

Piolih-Piolih Desa Adat luire :

1. Pioli-poli saking tegal, bangket miwah palaba Pura druwen Desa.
2. Pioli-poli saking salaran pasar miwah sasar in canang.
3. Pioli-poli saking Krama Desa.
4. Pioli-poli saking Sang Amawa Rat utawi Guru Wisesa.
5. Pioli-poli miwah dana punia utawi paica-paica tiosan sane sampun kapatutang miwah kajejerang antuk Desa manut pararem.

Pawos 28

1. Prajuru Dulun Desa wenang ngetangang pamupon utawi pioli-poli Desa Adat lan sapanunggalannya.
2. Pikoli lan pamupon Desa kaanggen prabeya upakara-upakara Usaba utawi Aci-aci miwah wewangunan ring Pura miwah sane tiosan.
3. Nyabran pasangkepan Desa, Prajuru Dulun Desa pangemong druwen Desa ngawentenang pari-indik munjuk lungsuring padruwean Desa ring Krama Desane.
4. Sakaluring druwen Desa patut wenten ilikitannya.
5. Tan kalugra ngadol utawi ngesahang padruwean Desa yan tan kasungkemin antuk Krama Desane.

Falet 6

SUKERTA PAMITEGEP

Kaping 1

Karang, Tegal Miwah Bangket Desa

Pawos 29

1. Krama Desa pangemong Tanah Karang Ayahan desa (tanah sane tan keni tiga sana) patut ngawatesin karang inucap antuk pager utawi turus miwah tembok panyengker mangda pakantenannya asri.
2. Wates sisi kaler miwah kangin, patut kakaryanin antuk sang mangemong karang inucap, sane mewasta gegaleng kahuluhan. Sajawaring tanah pacatu, tegal, bangket utawi tanah padruwean ngeraga sane kapiara batese sisi kelod miwah sisi kauh, sahantukan punika mawasta gegaleng kateben.
3. Prade karasayang pager utawi turus inucap ngalikadin, yan sami pada arsa panyandinge kengin bates punika nganggen painget kewanten kasaksinin antuk Prajuru Dulun Desa utawi nganggen prasihna pal saking Sang Amawarat.
4. Prade wenten karang kabebeng mangda kautsahayang wenten margi.

Pawos 30

1. Krama Desa dados nunas karang Desa; tata caraning nunas kalih molihang karang Desa manut pararem.
2. Sinalih tunggil krama sane pacang nunas karang, patut matur pinunas ka Desa. Prajuru Dulu Desa mawosin indik pinunase, manut daging pararem.
3. Sang sapa sira ugi sane sampun naherun nunas karang Desa, tur sampun kaicen, tan kawenangang malih nunas karang Desa.
4. Sajeroning nem sasih ngawit saking kapaica karang inucap, sang manunas wenang sampun ngenahin. Yening sajeroning nem sasih taler durung kagenahin, karang inucap kadaut malih antuk Desa.

Pawos 31

1. Sinalih tunggil krama Desa tan kalugra :
 - a. Ngalah-alah margi, tegal, bangket, karang Desa lan tiosan punika. Yan kapurug keni pamidanda manut pararem, saha ngewaliang genah sane kalahlah punika.
 - n. Ngalah-alah tanah tegak Kahyangan, setra lan sakancan tegak sane kasinanggeh suci. Yan kapurug keni pamidanda manut pararem tur ngewaliang genah sane kalahlah, saha kadulurin antuk upacara panyangaskara manut dresta.
 - c. Ngadol tanah tegak karang ayahan Desa.
 - r. Makarya palimbahan toya utawi limbah tinja ka-karang krama tios utawi ka pisaga wiadin ka margine utawi ka got-gote sane ngawinang palemahane resem miwah rusak. Yan kapurug keni pamidanda manut pararem.
 - k. Ngutang wangken wewalungan, luhu, ring margi-margine utawi ring got-gote wiadin sane tiosan punika ring sawawengkoning Desa, sane ngawinang lingkungan resem utawi kirang lestari. Yan mamurug keni pamidanda manut pararem tur wangken wewalungane inucap patut katanem antuk sang sane ngutang punika.
 - d. Ngutang toyan tinja utawi mabacin miwah makebotan ring margine utawi ring gote. Yan kapurug keni pamidanda manut pararem.
 - t. Ngaletihin Kahyangan utawi genah sane kasinanggeh suci. Yan kapurug keni pamidanda manut pararem saha kadulurin antuk upacara panyangaskara pratista manut dresta.
2. Yan prade wenten sinalih tunggil Krama Desa pacang ngadol wewangunan sane wenten ring karang ayahan Desa, miwah tegal utawi bangket patut masadok ring Prajuru Dulu Desa. Yan mamurug keni pamidanda manut pararem.

Kaping 2

Tanah Bangket Ayahan Desa

Pawos 32

1. Tanah bangket ayahan Desa inggih punika tanah-tanah sane kadruwe antuk I-Krama Desa Ngarep sane keni ayahan nyumek manut pawos (12) kaping 1.

Pawos 33

1. Tanah bangket ayahan Desa tan kalugra ka-adol ring tamiu.
2. Tan kalugra nguwah kawigunan Tanah Bangket Ayahan Desa.
3. Sinalih tunggil Krama Desa tan kalugra numbas Tanah Bangket Ayahan Desa rangkungan ring kalih saih (ayahan aji samas).
4. Sang mamurug kecap ring ajeng keni pamidanda manut pararem.

Kaping 3

K e k a y o n a n

Pawos 34

1. Yening ngawit nandur tanem tuwuh utawi kekayonan patut masukat adepa agung ngajeroang saking wates panyenger, yan prade jantos ngaliwat ring wates patut kasipat gancangin.
2. Yening wenten tetanduran ngungkulin semaliba mewastu mayen ka-pisaga patut kawara antuk paiguman, ping ajeng prasida sang manruwenang wit ngarebah utawi notor wit punika.
3. Prade sampun kawara taler tan wenten usaha sang manruwenang wit, sang rumasa katetahan utawi kajerihan wenang masadok ring Prajuru Dulun Desa, tur risampun kaparitas kalugra ngicalang wit inucap, sakewanten wit punika patut katurang ring Desa.
4. Sang keni pamidanda panyangaskara saha prabeya manut putusing pararem majeng ring wewangunan sang karubuhin luire :
 - a. Sang manruwenang wit kasinanggih mayanin, prade pungkut utawi rebah ngarubuhin wewangunan pisaga.
 - n. Sang notor utawi munggal, ngarebah wit prade mayanin wewangunan pisaga.
5. Prade wenten krama pacang nandur tanem tuwuh utawi kekayonan ring jaban pekarangannya utawi telajakannya patut masadok ring Prajuru Dulun Desa.
6. Krama Desa patut ngamanggehang utawi nitenin kawerdian tur miara tanem tuwuh utawi kekayonan Desa wiadin marupa tanem tuwuh sane ngawinang palemahanne utawi wawidangan Desane asri tur ajeg.

Kaping 4

W a w a n g u n a n

Pawos 35

1. Nyabran Ngawangun patut :
 - a. Masadok ring Prajuru Dulun Desa, pingajeng prade wewangunan punika ngeninin wates.
 - n. Ngangge sukat asta bumi miwah gagulak asta kosala-kosali sanistane manut ring patitis niskala.
 - c. Yan wenten ngangge asta bumi wiadin gagulak asta kosala-kosali, patut ngangge dresta sekadi sane sampun mamargi ring Desa Adat Bugbug.
 - r. Tan ngayubin ka pisaga.
2. Krama Desa sane madruwe panyenger utawi tembok, kengin ngungkulin antuk ceracapan masukat asiku (asta musti).
3. Prade wenten tembok penyenger utawi wewangunan jantos ngayubin, bilih-bilih tembok inucap ring telenging wates, risampun kawara tur kasadokang ring Prajuru Dulun Desa wenang kadanda manut pararem saha tembok inucap kagubar utawi sanistane mangda kakaryanang abangan. Yaning panyandinge sampun pada arsa, kakaryanang ilikita saha kasaksinin antuk Prajuru Dulun Desa.

Kaping 5

W e w a l u n g a n

Pawos 36

1. Sahanan krama sane miara wewalungan (bawi, risampun mabelas, banteng risampun matelusuk, utawi sane tiosan punika), patut sayaga nitenin negul utawi ngelogor mangda tan ngarusakin karang utawi pabyanan pisaga. Yan mamurug keni pamidanda manut pararem.
2. Prade wenten wewalungan malumbar utawi ngeleb ngarusak pakarangan utawi pabyanan pisaga, risampun kawara antuk Prajuru Dulun Desa kengin ketaban tur kadanda ngawilangin wit sane karusak saha patut nawur panebas wewalungan manut pangelokikan Prajuru Dulun Desa.
3. Prade jantos ngaletihin genah suci minakadi Pamerajan (Sanggah), Kahyangan Desa, Pura Pemaksan, lan sane tiosan punika, risampun kawara utawi kaparitas antuk Prajuru Dulun Desa wenang sang uruwenang wewalungan inucap kadanda manut pararem saha ngaturang pangupakara pamratista pamarisudha manut dresta; sajawaning mapapada ring Pura Kahyangan.

Pawos 37

1. Krama Desa patut sayaga nitenin, nyanggra wewalunganne miwah sarwa pranine. Tan kalugra maboros miwah nuba lan sapanunggalannya, minakadi : ngemademang paksi miwah nuba ulam, ula sawah miwah sane tiosan ring sawewengkon ing wawidangan Desa Adat Bugbug. Yan kapurug keni pamidanda manut pararem.
2. Sahanan wewalungan miwah buron sane kapiare antuk krama Desa ring sajeroning pakarangan kawara tur kailikitayang antuk Prajuru Dulun Desa manut pararem. Yan kapurug keni pamidanda manut pararem.

Pawos 38

1. Tan kalugra ngangon miwah negulang ingon-ingon ring :
 - a. Palemahan tegak Kahyangan.
 - n. Tanah utawi tegal melakang sane kapiara antuk Desa.
 - c. Margi ring wawidangan Desane.
2. Prade kapurug, wenang wewalungan punika kataban tur keni pamidanda manut pararem.

Kaping 6

B h a y a

Pawos 39

1. Bacakan bhaya wenten kasinanggeh Panca Bhaya, luire :
 - a. Jiwa bhaya : kabaak, lampus.
 - n. Arta bhaya : kemalingan.
 - c. Geni bhaya : katunuan utawi umah puun.
 - r. Er bhaya : belabar
 - k. Dura cara ring Agama, marikosa.
2. Sahanan Krama Desa sane uning ring jatma lumaksana dusta utawi kahanan bhaya (artha bhaya, miwah kaparikosa) patut atur uninga ring Prajuru Dulun Desa tur nepak kulkul bulus mapitulung manut pawos 21. Yan prade jiwa bhaya miwah geni bhaya patut nepak kulkul bulus tan atur supeksa.
3. Prade ring Desa kahanan jiwa bhaya miwah dura cara ring Agama, patut Desane ngawentenang upacara Bhuta Yadaya tur sang mayanin katur ring Sang Amawarat.
4. Prade wenten sinalih tunggil krama mamisuh utawi nguman-uman krama tios, jantos masadok ring Prajuru Dulun Desa, keni pamidanda bea pacamil tatebasan prayascita manut dresta.

Pawos 40

1. Sang manggihin kahanan artha bhaya (kamalingan), patut nepak kulkul bulus mapitulung manut pawos 21 utawi sang kamalingan matur supeksa ring Prajuru Dulun Desa sane pacang mapaica tatimbang utawi nuntun manut ring daging kekerthan jagat, saha mawuwuh upakara panyangaskara prade wenten jatma memandung barang sane kasinanggeh suci.
2. Pratingkahe mapailon ring dusta kabawos saruron, prade wenten jatma manggihin dusta tan atur supeksa ring Prajuru Dulun Desa, jantos jatma utawi krama tios nyadokang, patut sang mapailon kadanda kadi dandaning pandung, tur prade jantos ping tiga malaksana asapunika wenang kasukserah ring Sang Amawarat.
3. Prade wenten jatma ngarereh reramon, minakadi daun kelapa, ron lan sane tiosan, tanpa sadok ring sang nruwenang, yan kacunduk (katara) patut kadanda kadi dandaning maling.
4. Yaning wenten jatma ngaranjing ring pakubon wiadin pakarangan krama tios utawi pisaga ritatkala suwung, mewastu sang nruwenang karang kaicalan, wenang jatma inucap katuwekang antuk ma-Dewa Saksi ring Pura Desa (Bale Agung).
5. Mangda tan katuwekang sakadi ring ajeng, sang sapa sira ugi ngaranjing ring pakarangan krama tios, patut :
 - a. Matengeran suara (makaukan).
 - n. Nyantos sang nruwenang karang rauh, utawi masadok ring pangapitnya sane pinih tampek, maka buatan pangaranjinge.
 - c. Ngenahang sawen utawi surat utawi pipil ring pamedale utawi genah sane sampun cumawis, ngindikang maka buatan pangaranjinge.

Kaping 7

Ngarereh Taru Muwah Baburon

Pawos 41

1. a. Sang sapa sira ugi tan kalugra ngarereh taru-taru kekeran Desa ring :
 - 1). Tanah-tanah Druwen Desa utawi Druwen Pura.
 - 2). Tanah-tanah sane tiosan.
- n. Yan prade kapurug, sang mamurug patut kakeninin pamidanda marut pararem, tur taru inucap kadaut olih Desa.
2. a. Sang sapa sira ugi tan kalugra maburu, ngejuk miwah ngamademang baburon luire :
bojog, paksi, banteng alas, ula sawah lan sane tiosan, sane inucap arang ring sawawengkon wawidangan Desa Adat Bugbug.
- n. Yan prade kapurug, sang mamurug patut kakeninin pamidanda manut pararem tur buron inucap yan kantun maurip patut kewaliang ring genahe kakeniang; yening buron inucap sampun padem sang mamurug maweweh nawur patin buron inucap, tur wangken buron inucap kadaut olih Desa.

3. Yan wenten jatma tios (wong dura desa utawi dura negara) mamurug pawos puniki, Krama Desa Bugbug sane manggihin jatma inucap patut ngentenin utawi atur sasulur pinih rihin, yan sampun kapakelingang taler jatma inucap mamuwuk patut kasadokang ring Prajuru Dulun Desa turmaning jatma inucap kakeninin pamidanda manut pararem, tur pikolih buruannya kadaut olih Desa.

Pawos 42

1. Yening wenten buron ngarusuhin ring pakarangan utawi pabyanan turmaning ngawinang bhaya utawi panyangkalen sekadi : bikul, semal lan sane tiosan punika kengin kepademang utawi kaburu.
2. Ritatkalaning Desa mapawangun utawi maaci-aci ring Pura wenang ngamargiang alangan utawi rerampagan ring sawawengkon wawidangan Desa Adat Bugbug.

Kaping 8

Panyanggran Banjar

Pawos 43

Desa Adat Bugbug ritatkalaning ngawentenang aci-aci miwah ayah-ayah ring Desa patut kasanggra antuk Banjar miwah Subak utawi Sayan luir ipun :

1. Tatkalaning Aci utawi Usaba Manggung, Banjare nyanggra :
 - a. Ngawangun panggungan saha raramonnya ring Desa.
 - n. Ngugag utawi ngagah panggungan tur magagimpes.
 - c. Mapajeg saha raramonnya ka Pura Candidasa.
2. Tatkalaning Aci utawi Usaba Gumang (Aci Kadulu Gede) , Banjare nyanggra :
 - a. Ngawangun panggungan saha raramonnya ring Desa.
 - n. Ngugag utawi ngagah panggungan tur magagimpes.
 - c. Ngararata ring Pura, ring margi-margine ka Gumang, lsp.
 - r. Ngamedalang toya miwah daun papahan ka Gumang.
 - k. Ngingu patamiyuan Desa luire : Pamaksan Bebandem, Jasri, Ngis miwah Datah.
3. Tatkalaning Aci ring Pura Piit, piodalan Sang Hyang Raja Purana, Banjare nyanggra ngamedalang ayah Daha-Tarunannya saha makta cepetik lan sasurakan antuk daun jaka maoncer.
4. Tatkalaning Aci Dalem utawi Usaba Kelod, Banjare ngarerata ring Pura Dalem miwah ring margi-margine pacang ka Pura.
5. Tatkalaning Aci utawi Usaba Kaja, Banjare nyanggra :
 - a. Nguwangun panggungan saha raramonnya ring Puseh.
 - n. Ngugag utawi ngagah panggungan tur magagimpes.
 - c. Ngingu patamiuan Desa.

6. Tatkalaning Aci utawi Usaba Bukit gundul miwah Bukit Pajinengan, Banjare nyanggra :
 - a. Makarya wawarung saha raramonnya ring : Bukit Gundul, Bukit Pajinengan miwah ring Belong.
 - n. Ngararata ring Pura miwah ring margi-margine jaga ka Pura.
 - c. Ngamedalang toya miwah raramon sane tiosan ka Belong utawi Bukit Gundul miwah Bukit Pajinengan.
7. Tatkalaning Desane ngayu-ayu, saantukan keni kaparebehan.
8. Tatkalaning nandur kekayonan tanem tuwuh ring sawawengkoning wawidangan Desa Adat Bugbug.
9. Tatkalaning Aci utawi Usaba Klame, kawawa antuk Subak miwah Sayan kasanggra antuk Desa.
10. Panyanggran Banjar sane tiosan kamargiang manut wiguna.

Kaping 9

Daha Taruna Lan Panyanggrannya

Pawos 44

1. Indik Daha Taruna ring Desa Adat Bugbug manut panyanggrannya wenten kalih soroh, luire :
 - a. Daha-Tarunan Desa, ngayah nyanggra Desa manut ring ayah-ayahan Krama Desa Ngarep.
 - n. Daha-Tarunan Banjar (Seka Taruna-Taruni), ngayah nyanggra Desa manut ring ayahan panyanggran Krama Banjar sowang-sowang.
2. Pakraman Daha Taruna puniki kawentenang manut yusa lan swadarmannya.
3. Daha Taruna puniki kawenangannya sewaka widya sastra ngawerdiang Daha Taruna tur ngayomin ring sajeroning swadarmaning " Y U W A N A " mamerihang ka-jagadhitan.

SARGA IV

SUKERTA TATA AGAMA

Palet 1

Indik Dewa Yadnya

Pawos 45

Palinggih panyiwian ring sawawidangan Desa Adat Bugbug saha pangemponnya luire :

1. Kahyangan sane kaempon utawi kawawa antuk Desa Manut Pawos 26.1.
2. Kahyangan sane kaempon antuk Krama Pemaksan manut Pawos 26.2.
3. Kahyangan sane kaempon antuk Krama Subak utawi Sayan manut Pawos 26.3.

Rerahinan, Piodalan, Usaba utawi Aci-Aci sowang-sowang Kahyangan utawi Pura sane wenten ring sawawidangan Desa Adat Bugbug sekadi ring sor puniki :

1. Ring Kahyangan Tiga luire :

- a. Pura Desa utawi Pura Balai Agung, sane kawastanin Usaba utawi Aci Manggung kamargiang ngawarsa ritatkalaning Sasih Kasa nuju Beteng, sajeroning tanggal ping : 13, 14, 15.
- n. Pura Puseh utawi Meru, kamargiang ngawarsa apisan pelaksannanyane katunggalang ring Usaba Pangalapan, ritatkalaning Sasih Kalima nuju Beteng, sajeroning tanggal ping : 13, 14, 15.
- c. Pura Dalem, sane kawastanin Usaba utawi Aci Kelod kamargiang ngawarsa ritatkalaning Sasih Kasanga nuju Kajeng, sajeroning pangglong ping : 10, 11, 12.

Runtutan Acinya ring Sasih Kasanga, saking :

- 1). Tanggal ping : 13, 14, 15 nuju Kajeng kawastanin Pangajengan Bugbug Kaler, ring Puseh.
- 2). Pangglong ping : 1, 2, 3 nuju Kajeng kawastanin Pangajengan Bugbug Tengah, ring Bale Agung.
- 3). Pangglong ping : 4, 5, 6 nuju Kajeng kawastanin Pangajengan Bugbug Kelod, ring Segaa.
- 4). Pangglong ping : 7, 8, 9 nuju Kajeng kawastanin Miyut.

2. Kahyangan tiosan sajawaning Kahyangan Tiga luire :

- a. Pura Pasek, tatkalaning Sasih Kasa sajeroning tanggal ping : 10, 11, 12 nuju Beteng.
- n. Ritatkalaning Sasih Kasa sajeroning tanggal ping : 13, 14, 15 nuju Beteng, Aci-aci ring :
 - 1). Gaduh Bhatara Lingsir ring Pura Puseh.
 - 2). Pura Paswikan.
 - 3). Pura Ayung utawi Pura Bhatara Sri.
 - 4). Pura Pamengkang.
 - 5). Pura Babotoh.
 - 6). Palinggih Bhatara Ayu Sambah.
 - 7). Palinggih Bhatara Bagus Sakenan.
 - 8). Palinggih Bhatara Rambut Sedana.
 - 9). Palinggih Bhatara Maspahit utawi Manjangan Saluang.
 - 10). Palinggih Bhatara Ayu Maospahit.
 - 11). Palinggih Bhatara Gede Galogor.
- c. Pura Cilidasa utawi Candidasa tatkalaning Sasih Kasa Pangglong ping : 1, 2, 3 nuju Beteng.

- r. Ritatkalaning Sasih Karo, nuju Beteng, sajeroning tanggal ping : 13, 14, 15 ngapetang dasa warsa apisan, kamargiang Usaba utawi Aci Kaja maruntutan Aci ring Gunung Sari.
 - k. Ritatkalaning Sasih Kapat, nuju Beteng sajeroning tanggal ping : 10, 11, 12 Usaba utawi Aci ring Pura Penyarikan.
 - d. Ritatkalaning Sasih Kapat sajeroning tanggal ping : 13, 14, 15 nuju Beteng Usaba utawi Aci ring Pura Gumang ring Bukit Juru.
 - t. Ritatkalaning Sasih Kapat sajeroning pangglong, ping : 1, 2, 3, nuju Beteng, Usaba utawi Aci ring Pura Bias Putih.
 - s. Ritatkala Sasih Kalima nuju Beteng, sajeroning tanggal ping : 13, 14, 15 Usaba utawi Aci ring Pura Pangalapan utawi Pura Ulu Suwi.
 - w. Ritatkala Sasih Kalima nuju Beteng, sajeroning tanggal ping : 13, 14, 15 ngapetang dasa warsa apisan, kamargiang Aci utawi Usaba Klame.
 - l. Ritatkala Sasih Kanem nuju Kajeng, sajeroning tanggal ping : 13, 14, 15 Usaba utawi Aci ring Pura Pasujan.
 - m. Ritatkala Sasih Kawolu nuju Kajeng, sajeroning tanggal ping : 13, 14, 15 kawastanin Usaba Kapitu, piodalan ring Pura Dadia utawi ring Dukuh sowang-sowang.
 - g. Ritatkala Sasih Kawolu nuju Kajeng, sajeroning tanggal ping : 13, 14, 15 Aci ring Bucu-Bucu.
 - b. Ritatkala Sasih Kawolu nuju Busaya, sajeroning pangglong ping : 13, 14, 15 Piodalan Sanghyang Raja Purana ring Pura Piit, kamargiang manut dresta.
 - ng. Ritatkala Sasih Kadasa nuju Beteng, sajeroning tanggal ping : 13, 14, 15, yening wenten pacirian Banteng Lembu (Banteng Luh Sane Putih) Kamargiang Usaba utawi Aci Ageng ring Pura Bukit Gundul ; sanangken ngawarsa kamargiang Aci Alit.
 - p. Ritatkala Sasih Kadasa nuju Beteng, sajeroning tanggal ping : 13, 14, 15, yening wenten pacirian Banteng Suranggana (Banteng Muani Sane Putih Matanduk Putih), kamargiang Usaba utawi Aci Ageng ring Pura Bukit Pajinengan ; sanangken ngawarsa kamargiang Aci Alit.
 - j. Ritatkala Sasih Jyesta nuju Beteng, sajeroning tanggal ping : 13, 14, 15, kawentenang Aci tatebahan ring Pura Balai Agung.
 - y. Ritatkala Sasih Sada nuju Beteng, sajeroning tanggal ping : 13, 14, 15, Usaba utawi Aci ring Segara.
 - ny. Ritatkala rahina Buda Wage Kulawu, piodalan ring Pura Melanting kalih Bhatara Rambut Sedana ring Sanghyang Ambu.
3. Rerahinan-rerahinan sane tiosan sane durung munggah ring awig-awig puniki kamargiang manut dresta.
 4. Usaba utawi Aci-aci muang piodalan ring sowang-sowang Kahyangan utawi Pura inucap ring ajeng manut kawentenan lan pararem Krama Desa.

Pawos 47

1. Ring sowang-sowang Kahyangan utawi Pura inucap kawentenang Pemangku utawi Pangempu.
2. Ngadegang Pemangku utawi Pangempu manut dudonan :
 - a. Nyanjan utawi masemuran, mapiteges mapinunas ring ajeng Panataran.
 - n. Turunan utawi mawaris.
 - c. Kacatri utawi kajudi (kapilih) olih Paruman Desa miwah Paruman Nayaka.
3. Tan kawenang anggen Pemangku utawi Pangempu luire :
 - a. Cedangga : peceng, perot, cungk, lan sapanunggalannya.
 - n. Sang sapa sira ugi sane tan kapatutang manut pararem.
 - c. Sakit ila, ayan, buduh utawi macihna sungkan-sungkanan.
 - r. Sane madruwe kasucian tan becik.
4. Prabeya Upakara Kapemangkuan :
 - a. Adiksa Widhi utawi ngawintem kamedalin saha kalaksanayang antuk sang ngadegang, makadi Krama Desa utawi Pengempon Pura sowang-sowang.
 - n. Mapitra Yadnya riwekas kalaksanayang antuk kulawarga sira mangku manut dresta, Desa miwah Pemaksan manut dudonan patut ngicen tatingan manut pararem.
5. Pemangku utawi Pangempu patut ngamanggehang sasanan Pemangku utawi Pangempu manut dresta.

Pawos 48

Swadarmaning Pemangku utawi Pangempu luire :

1. Ngenterang upacara piodalan ring Kahyangan utawi ring sowang-sowang Krama.
2. Tan wenang salab-sulub; yan mamurug wenang mangku inucap nyepuhin raga utawi mrayascita raga.
3. Prade silih tunggil mangku kapialang utawi katiben cuntaka, kengin ngaturin mangku tiosan maka pangentos ngemargiang upacara.
4. Yan prade risampun dane mangku utawi pangempu ngayah ring Pura, kancit wenten kulawargannya kapademan, mangku inucap tan keneng cuntaka yaning mangku tan budal saking Pura selami piodalan ka genah sang kapademan.
5. Tan wenang ajajuden, mamunyah, astadusta.

Pawos 49

Patuas utawi olih-oli Pemangku utawi Pangempu luire :

1. Apahliman sarin canang.
2. Luput pakaryan miwah kakenan raramon.
3. Paica-paica tiosan manut pararem.

Pawos 50

Pemangku utawi Pangempu kagentosin riantukan :

1. S e d a.
2. Pinunas ngaraga, tur risampun polih wak-wakan saking Desa.
3. Kausanang antuk Krama Desa dwaning melaksana tan patut, satata mamurug daging awig-awig kasukertan Desa, turmaning mangku inucap keni pamidanda manut pararem.

Pawos 51

Kasukertan Kahyangan kadi ring sor :

1. Tan kalugra ngeranjing ka Pura, luire :
 - a. Sang katiben catur cuntaka minakadi :
 - 1). Sebel kandel ngaraja sewala selami durung mabersih.
 - 2). Sebel pangantenan selami durung mabeyakala utawi marebu.
 - 3). Cuntaka sangkaning kapademan manut senger (12 rahina).
 - 4). Sebel madruwe putra miwah karuron selami abulanpitung rahina (42 rahina).
 - n. Makta sahanan barang sane kasinanggeh ngaletchin.
 - c. Makta sato, wewalungan, miwah buron piaraan tiosan sajawaning pacang mapapada ritatkala aci utawi usaba.
 - r. Mabusana tan manut kadi tata caraning busana ngeranjing ka Pura.
 - l. Sadurung polih wak-wakan utawi pituduh Prajuru Dulun Desa.
2. Trepti laksana, tan wenang ring Pura :
 - a. Masumpah utawi cor, sajawaning pituduh Prajuru Dulun Desa.
 - n. Mapitungkas, masascnengan, makolem dados asiki lanang istri, mabacin, mawarih, nyangsangang busana, mecikang pusungan, santukan punika ritatkala majajahitan patut ngehung busung macongger lidinya.
 - c. Mamisuh kalih wak parusya tiosan, manyidra wong tios bilih-bilih jantos metu rah.
 - r. Munggah tedun penataran palinggih-palinggih Kahyangan sajawaning sane kapastikayang antuk Prajuru Dulun Desa.
3. Sang mamurug kecaping ajeng keni pamidanda mwah upacara prayascita sapatutnya manut pararem.

Pawos 52

1. Yan wenten wong utawi jatma katakson utawi karauhan ring Pura, kengin kapintonin prade kasumangsayanin, yan tan wiakti jatma inucap patut kasisipang tur kadanda manut pararem.
2. Prade Kahyangan kahanan durmanggala, minakadi kapancabhaya, Pemangku utawi Pangempu patut digelis nyadokang ring Prajuru Dulun Desa mangda marumang Krama Desa tur ngawentenang pamrayascita sepatutnya manut dresta.

Palet 2

INDIK RESI YADNYA

Pawos 53

1. Sang sapa sira ugi ring Desa Adat Bugbug pacang madeg pinandita makadi : Pemangku utawi Pangempu, Sedahan, Kubayan, Dalang miwah sakaluring pacang ngenterang yadnya patut masadok ring Desa.
2. Prajuru Dulun Desa patut natasang, nitenin saha ngayomin tur nuntun nyulurang ilikitannya mangda pamargine manut ring dresta miwah kakecap sastra agama Hindu.
3. Yan prade pamargine kacihnian sasar laksana tan manut ring dresta miwah kakecap sastra agama Hindu, Prajuru Dulun Desa wenang mialang sang pacang madeg pinandita inucap.
4. Yan prade manut ring dresta miwah kakecap sastra agama Hindu, Prajuru Dulun Desa wenang sareng nyaksinin pamargi upacaranya saha nyiarang ring Krama Desane sami.

Pawos 54

Sang madruwe karya utawi yadnya patut ngaturang punia ring sang sane muput yadnyane maduluran antuk peras, daksina panganteb saha sasantunnya manut agung alit yadnyane.

Pawos 55

1. Sang sane sampun madeg pinandita ring Desa Adat Bugbug patut ngarihing miwah ngutamayang muput sabacakan upacara utawi upakara ring Desa.
2. Sasampun punika wawu kengin muputang yadnya tiosan miwah yadnyane ring jaba Desa.
3. Prajuru Dulun Desa patut nuntun saha ngamanggalain krama Desa Adat Bugbug mikukuhin kasucian linggih para wikune utawi para pinanditane.

Palet 3

INDIK PITRA YADNYA

Pawos 56

1. Pitra yadnya matatuwek ngawentenang yadnya bakti pinaka jangkeping swadarmaning ngardi kasucianing Sang Hyang Pitra, skala lawan niskala.
2. Mungging tata wangun saha panglaksanannya manut ring dresta.

Pawos 57

Pamargin Pitra Yadnya madudonan sekadi ring sor :

1. Pangupakara sang seda :
 - a. Antuk mendem utawi ngeseng makacihna pakingsan ring Pertiwi utawi ring Gni (Brahma), selami nuptupang prabeya.
 - n. Atiwa-tiwa utawi Upacara pengabenan utawi palebon.

2. Upacara utawi upakara Pitra Yadnya risampun wusan ngaben patut kalanturang antuk upacara Atma Wedhana manut dresta minakadi : Ngusaba Kelod makamiwah mapajati ka Segara, ka Ulun Suwi.

Pawos 58

Swadarmaning lan tategenan prade wenten sinalihn tunggil krama kasedayan :

1. a. Matur supeksa ring Prajuru Dulun Desa.
n. Ngaturin warga utawi pawarisan makarya eteh-ete kadulurin panyambrama manut kawentenan.
c. Kulawarga miwah krama tiosan nganter sawane ka setra jantos puput mapendem utawi ngeseng miwah nganyut ka segara.
2. Tan kalugra nginepang bambang.
3. Prade wenten kasedayan rikalaning piodalan, wenang kapendem, sakewanten tan kalugra ngamarginin ka margine ageng, miwah tan kadadosang nyekeh sawa sajeroning piodalan.
4. Sawa sane sampun kapendem tan kengin kaebet malih, sajawaning sampun wenten paiguman saking Prajuru Dulun Desa Adat Bugbug sareng Sang Mawarat.
5. Prade wenten wong saking jaba Desa, tiosan ring krama Desa Adat Bugbug utawi krama desa sane sampun kasepekang, padem ring wawidangan Desa Adat Bugbug, tan kalugra mendem utawi ngeseng ring setra Desa Adat Bugbug, sajawaning saking pituduh Sang Mawarat.
6. Tan sarat atiwa-tiwa : anak alit sane durung maketus, manut dresta.
7. Yening padem salah pati, ngulah pati miwah sane tiosan kaupakara sakadi patut tur kawewehin upakara manut dresta.
8. Yening kahanan wong padem ring sajeroning pekarangan, tegalan, carik lan sane tiosan druwe krama tios, patut sang madruwe sawa mrayascita genah inucap.
9. Rikalaning pacang mambang mangda masukat abelah utawi atengah depa saking sutering bambang sane tiosan.
10. Makarya bambang tan kalugra numpukin papendeman krama tios.
11. Yan mamurug kecap pawos 58, keni pamidanda manut pararem.

Pawos 59

Cuntaka kasedayan utawi kapademan :

1. Kapademan cuntakanya sebel pekarangan ngantos roras rahina.
2. Ngaben cuntakanya ngawit saking ngaringkes ngantos matuhun
3. Sane katiben cuntaka warga sajeroning pekarangan.

Pawos 60

1. Atiwa-tiwa utawi pangabenan kalaksanayang antuk :
 - a. Sawa prateka.
 - r. Sawa Kresian
 - n. Nyuwasta.
 - k. Supta pranawa.
 - c. Ngarecedana.
2. Panamayan pangabenan wenten kalih pawos :
 - a. Ngaben ngamasa Sasih Karo manut pangembak Desa.
 - n. Ngaben dadakan utawi bahbangun mangda matur rihin ka Desa, kadadosang sajeroning pitung rahina mangda sampun puput.
3. Dudonan pangabenan ngawit saking ngagah utawi seda, ngeseng utawi mendem jantos pangiriman utawi nganyut utawi mendem.

Palet 4

INDIK MANUSA YADNYA

Pawos 61

1. Manusa yadnya inggih punika upacara daimaning manusa, ngawit saking patemoning kama bang lan kama petak, sajeroning garba ngantos padem kawekas.
2. Upacara kadi ring ajeng madudonan sakadi ring sor :
 - a. Magedong-gedongan duk pangerempinian.
 - n. Duk sang kama-reka medal utawi mapag rare.
 - c. Kepus pungsed utawi kepus odel
 - r. Roras rahina.
 - k. Tutug kambuhan ring abulan pitung rahinane utawi 42 rahina.
 - d. Tigang sasih utawi nelu bulanin.
 - t. Ngotonin utawi nem sasih.
 - s. Menek kelih utawi ngerajasewala (ngembakin)
 - w. Matatah utawi mapandes.
 - l. Mawiwaha utawi marabian.
 - m. Ma-sih.
 - g. Masaluk utawi mawinten.
3. Upacara-upacara inucap kalaksanayang nista. madya, utama manut sastra gama saha catur dresta maka buatan Desa Dresta, nganutin sima cara Desa.

Palet 5

INDIK BHUTA YADNYA

Pawos 62

1. Bhuta yadnya inggih punika upacara-upacara pabeya-kala ring pertiwi miwah, sarwa prani lan babhutan.

2. Upacara pabeya-kala ring sarwa prani luire :
 - a. Ring sarwa tumuwuh ritatkala Tumpek Pangatag ; Saniscara, Kliwon, wuku Wariga.
 - n. Ring sarwa ingon-ingon ritatkala Tumpek Kandang; Saniscara, Kliwon, wuku Uye.
 - c. Upacara pakala-kalaan manusa manut wiguna, kabawos " Pabeyakala ".
3. Upacara pabeyakala ring pertiwi, kahyangan miwah babhutan, kawastanin " Macaru ".
4. Pacaruan inucap ring ajeng, nista, madya, utama manut wiguna kadi ring sor :
 - a. Segehan.
 - n. Eka Sata.
 - c. Panca Sata.
 - r. Panca Sanak utawi Caru Lantang.
 - k. Panca Kelud.
 - d. Resi Gana utawi Tabuh Gentuh.
 - t. Tawur Agung.
5. Pacaruan sasih kawentenang manut dresta.

Pawos 63

1. a. Nangken ngawarsa ritatkalaning sasih Kanem nuju Kajeng sajeroning Pangglong ping :
13, 14, 15 kamargiang Caru Ngid.
- n. Nangken ngawarsa ritatkalaning Sasih Kapitu nuju Kajeng sajeroning Panglong ping :
13, 14, 15 kamargiang Caru " Muu-Muu ".
- c. Nangken ngawarsa ritatkalaning Tilem Kasanga kamargiang Tawur Kasanga,
makacilna pamapag rahina " Panyepian Jagat " benjangne.
2. Brata Panyepian sane patut kamargiang antuk krama Desa luire :
 - a. Amati geni, tan kengin mapi-api.
 - n. Amati karya, tan kengin makarya.
 - c. Amati lalungayan, tan kengin malalungayan utawi malaluasan.
 - r. Amati lalangan, tan kengin maoneng-onengan, masuara gora, lan sane tiosan punika.
3. Pabratan Panyepian Jagat inucap kamargiang saking semeng ngantos semeng benjangne.
4. Sang mamurug kecaping ajeng keni pamidanda manut pararem Desa saha kamargiang
antuk Pacalang Desa.
5. Riwus rahina panyepian utawi ring rahina ngembak nyepi, wiakti pangawit "Icaka Warsa"
patut krama Desa sowang-sowang madharma santhi utawi saling aksamain.
6. Caru Lantang utawi Panca Sanak kawentenang ngadasa warsa apisan ritatkala Sasih
Katiga nuju Kajeng, sajeroning Pangglong ping : 13, 14, 15 nemoning Icaka Rah Windhu.

SARGA V
SUKERTA TATA PAWONGAN

Palet 1

PAWIWAHAN

Pawos 64

1. Marabian inggih punika patemoning purusa-pradhana (lanang sareng istri), malarapan antuk nunggalang kahyun suka-cita (arsa sami arsa) kadulurin antuk Tri Upasaksi skala-niskala.
2. Pamargin pawiwahan (parabian) :
 - a. Mamadik (Ngidih).
 - n. Marangkat (Ngerorod).
 - c. Ngunggahin.
 - r. Nyeburin.
3. Pidabdab sang pacang marabian patut :
 - a. Nganutin yusa sampun munggah Daha-Taruna manut sukertaning tata cara pawiwahan (manut kakertan jagat).
 - n. Sangkaning sami pada arsa.
 - c. Manut kecaping agama.
 - r. Prade pangambile tios agama, patut kasudhi wadhani kamanggala antuk upacara /upakara "Sudhi-Wadhani".
4. Pamargin pawiwahan inucap nganutin Awig-Awig Desa Adat Bugbug lan sukertan jagat/ Sang Mawarat.
5. a. Mamitra ngalang, nyolong semara, tuna susila tan kapatutang wenten ring sawawengkoning wawidangan Desa Adat Bugbug.
 - n. Yan prade wenten purun mamurug ngalaksanayang utawi ngewechin genah/saruron ring anake asapunika patut kakeninin pamidanda manut pararem.
6. Parabian sane kapatutang ring Desa Adat Bugbug sakadi ring sor :
 - a. Sampun kamargiang pabeakalan utawi parebuan manut dresta, saha kasinaksiang skala-niskala.
 - n. Prajuru/Dulun Desa patut mapakeling utawi ngilikitayang indik parabian utawi pawiwahan punika.
7. Sang mamurug kecap ring ajeng patut katiwakin pamutus manut pararem.

Pawos 65

Tata caraning parabian utawi pawiwahan ring Desa Adat Bugbug sakadi ring sor :

1. Sang sapasira ugi pacang ngawarangang pakulawargan patut masadok ring Prajuru/Dulun Desa, selanturnya Prajuru/Dulun Desa maritatas manut kalawan tan manut pariindik pawiwahane.

2. a. Pamargin papadikan malarapan ngaturang canang paneduh majeng ring niskala.
 n. Saking kulawargan lanange ngamargiang pamilaku majeng ring kulawargan wadon maserana antuk jambe sedah.
 c. Mangda tumus skala-niskala parabiane patut kawentenang pabeakalan/pararebuan saha widhi-widhana, wus punika kulawarga lanange ngaturang pejati ring pamrajan wadone.
3. Yan prade marangkat utawi ngerorod, patut :
 - a. Raraman lanange ngawentenang pamilaku utawi pejati antuk utusan sekiranya 2 (kalih) diri.
 - n. 1). Pagenahan ngantene tan kengin ring pakubon sang lanang sadurung mabeakala utawi marebu.
 - 2). Kramane sane nampi sang ngerorod, patut pramangkin masadok ring Kelihan Banjar.
 - 3). I Kelihan Banjar patut digelis nureksain tur netes sang ngerorod, maka buatan marityaksayang manut utawi tan manut pamargine ring daging Awig-Awig muwah drestane.
 - 4). Prade pamargine sampun nepek ring dresta (Awig-Awig), sang ngerorod miwah sane nampi polih pamikukuh utawi pasayuban Banjar minakadi Kelihan/Prajuru/Dulun Desa.
 - 5). Prade pamargine tan manut ring dresta (Awig-Awig), Kelihan patut digelis mialang (malasang). Sang kinira-kira katetehan kawehin pasayuban ring jeron Kelihane.
 - 6). I Kelihan patut digelis ngutsahayang mitahu wirang ring sang katetehan punika,. prade genah nyane ring dura Desa utawi dura negara, utsahane katur ring Sang Mawarat manut dudonan.
 - 7). Sang mamiseka sasampune kaparitas wasta kalih umahnyane patut keni pamidanda manut pararem.
 - 8). Kramane sane nampi tur tanpa sadok, patut katetes katureksa manut ring prakertinyane, yan macihna saruron ring corah utawi sareng misekayang, wenang keni danda agung alit manut pararem.
 - c. Yan sampun wenten pejati, prade rangkate kasumangsayanin antuk kulawarga sane wadon, kengin kanurgiang panetes, nganutin tata cara panetes, luire :
 - 1). Sang pacang netes pangarorode, patut masadok tur nunas panuntun ring Kelihan Banjar. I Kelihan Banjar nureksa natasang saserep punika, jati tan jatine patut kapernah wirang sang ngarorod.
 - 2). Yan linggihnyanae jati-jati kapernah wirang,. I Kelihan patut digelis nganter panetes punika ka-umah genah sang ngarorod mengkeb.
 - 3). Sang manetes patut satinut ring sapituduh Kelihan ngeninin tata cara netes pangrorodan, luire :
 - a. Ngeranjing ka-umah inucap tan rangkungan ring kalih diri.

- n. Tan kengin makta sanjata utawi gegawan sakaluire.
 - c. Tan kengin matingkah kalih mabawos parusya.
- 4). Sasampune napak ring umah genah sang ngarorod mengkeb, I Kelihan patut midabdabin mangda tata cara panetese trepti makabuatan mangda anake istri sane karangkatang jati-jati polih nerangang idepnyane sujatinipun. Wirang anake masaserep punika mangda polih mirengang babawos anake istri punika. Luir pidabdabe :
- a. Anake istri kagenahang ngeraga, tan dados anak tios nganampekin mawates 3 (tigang) depa, tur tinas ring inange.
 - n. I Kelihan nuntun nyulurang, mangda sang manetes polih mataken ring sang istri punika.
 - c. I Kelihan nyumakutayang pamekas ring sang istri, mungguing dane pacang ngicenin pasayuban manut ring daging idep sang istri, yan pada arsa pangerorode sang manetes pacang katulak, yan sangkaning mamiseka sang lanang pacang katiwakin pamidanda.
- 5). Pamupute I Kelihan dumugi lumaksana manut ring pamutus idep anake istri punika.
4. Sajeroning pakurenan pangalukuan patut :
- a. Kamanggala antuk geng pangampura majeng ring reraman wadone.
 - n. Kaigumang indik bawos idih-pakidih utawi pategayan majeng ring pasewakan sang ngidih saha padewasan pawidhi-widhanaan riwekas.
 - c. Kacihnayang indik kapurusa utawi prade santana rajeg kajejerang, kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang santana rajeg.
5. Upacara/upakara tinas apadang (muput) mapikuren manut sakadi ring sor :
- a. Kalaksanayang ring skala niskala masarana antuk pawidhi-widhanaan.
 - n. Ngadungang kahyun sowang-sowang pakulewargan wadone.
 - c. Widhi-widhana pajati niskala nunas wadone ring pamrajan (Sanggah Kamulannya).
 - r. Pamekas ring skala kasaksinin antuk Prajuru/Dulun Desa saha kailikitayang.

Palet 2

INDIK NYAPIAN

Pawos 66

1. Pawiwahan prasida kausanang malarapan antuk palas marabian utawi kasedayan.
2. Wusan marabian, santukan sinalih tunggil seda mapiteges balu makadi: balu lanang utawi balu istri.
3. Palas marabian sane kabawos nyapian, wenten kalih pawos, inggih punika : Sangkaning pada lila utawi mawiwit wicara.

4. Sang jaga palas marabian patut matur supeksa pailikitannya rihin ring sang rumawos (Sang Mawarat), wastu tinas apadang pamutuse kabawos nyapian, wawu Prajuru/Dulun Desa nyiarang indik kawentenannya ring Desa.

Pawos 67

Tata caraning palas marabian sangkaning pada arsa sakadi ring sor :

1. Nawur prabea pasaksi sinalih tunggil sami matengah.
2. Pabekelan, tadtadan sowang-sowang kakuasa niri-niri, mwah warisan kakuasa antuk purusa.
3. Pagunakayan polih pah-pahan pada.
4. Ngaweruhin miwah ngupajiwan pratisentana manut swadarmaning kang sinanggeh purusa.

Pawos 68

Prade riwekas sang palas marabian kacihna adung malih, patut :

1. Malih ngalaksanayang pabeakalan miwah pawidhi-whidanaan.
2. Keni pamidanda nikel saking dandan palase, yadiastun wit palase pecak sangkaning pada arsa.

Pawos 69

1. Sang balu kabinayang dados :
 - a. Balu luh wit santana (santana rajeg) miwah balu luh boya santana rajeg.
 - n. Balu muani kapurusa (wit santana) miwah balu muani nyeburin boya santana.
2. Swadarmaning balu luh inucap patut :
 - a. Ngamanggehang pati brata tan kengin ngamargiang paradara utawi dratikrama.
 - n. Nguasayang lan muponin waris pagunakayan, tan dados ngadol,ngadeang, makedihang lan sane tiosan punika, sajawaning sampun kalugra antuk pianak utawi kalugra antuk waris pinih tampek sakeng kurenannya prade pianaknyane kantun alit-alit.
 - c. Kengin ngedih santana prade wenten pidabdab sadurung sinalih tunggil seda saha kalugra antuk kulawarga kang sinanggeh kapurusa.
 - r. Kawenangang mawiwaha malih, prade sampun kalugra manut angka 2 aksara (n) ring ajeng.

Pawos 70

1. Balu luh sane kaucap tan pageh ring sor :
 - a. Dratikrama utawi paradara (macihna nyolong semara).
 - n. Matilar saking umah utawi pakubon tanpa sadok jantos 3 (tigang) sasih.
 - c. Lempas ring swadarma sane tiosan, tan prasida ngeschin solah, maprawerti lempas ring pituduh kulawarga purusa.

2. Balu sekadi kaucap ring ajeng, sane sampun ninggal swadarmaning balu wenang keni pamidanda manut pararem.

Palet 3

INDIK SANTANA

Pawos 71

1. Santana wenten kalih pawos, inggih punika sane kabawos pratisantana miwah santana papcrasan.
2. Pratisantana inggih punika, santana sane metu saking pawiwahan kapatut.
3. Prade pawiwahane tan patut ngawetuang santana, mangda tan kantun kawastanin santana babinjat utawi astra, patut kamanggala antuk panyangaskara/upacara.
4. Prade pawiwahane tan ngawetuang santana, kengin ngedih santana antuk upacara miwah upasaksi skala-niskala sane kawastanin santana " paperasan ".
5. Santana rajeg inggih punika, pratisantana wadon (pradhana) sane kamanggehang dados purusa.
6. Sang sane dados kamanggehang santana rajeg inggih punika :
 - a. Sinalih tunggil pratisantana wadon.
 - n. Sampun kamanggehang dados pratisantana purusa.
 - c. Parabian kaceburin kautamayang antuk jadma sane magama Hindu utawi jadina sane pecak magama tiosan sane sampun ngalaksanayang upacara pamarisudha utawi sudha-wadhani.
 - r. Sane ngamanggehang santana rajeg patut masadok ring Prajuru/Dulun Desa/ Kelihan Banjar, tur I Kelihan Banjar patut nyiarang ring krama Banjar saha ngaturang ring Prajuru/Dulun Desa.

Pawos 72

1. Meras santana manut dudonan, patut masadok antuk skala-niskala.
2. Sang sapa sira ugi krama sane pacang meras santana patut masadok ring Prajuru Desa sanistane tigang sasih sadurung kamanggih pamerasan.
3. Kelihan Desa kasanggra antuk Kelihan-Kelihan Banjar nyiarang ring wawidangan Desa, sang sapa sira ugi sane rumasa tan cumpu (tan lila) mangda digelis nyadokang ring I Kelihan masengker asasih sabanen pamerasan kalaksanayang.
4. Prajuru/Dulun Desa digelis mawosin sahan ngicen pamutus manut pararem.
5. Prade sulur paperasan tan manut kecaping ajeng, Prajuru/Dulun Desa wenang ngandeg sang pacang makarya, saha ngicen panuntun mangda kapuputang rihin babawos sulur utawi wicaranya.

Pawos 73

1. Paperasan sane patut ring Desa Adat Bugbug, risampun makacihna :
 - a. Maupacara/upakara Widhi-Widhana pamerasan.
 - n. Kasaksinin antuk Prajuru/Dulun Desa sane makelingang utawi ngilikitayang, tur polih ilikita saking Sang Mawarat.
 - c. Kasiarang ring wawidangan Desane.
2. Sane kapatut peras anggen santanan kadi ring sor :
 - a. Jadma sane magama Hindu.
 - n. Kapernah nedunang saking sang mameras.
 - c. Kulawarga saking purusa, prade tan wenten, kengin saking wadon, yening taler tan wenten wawu kengin sakama-kama (saking kahyun sang mameras).
3. Kengin meras santana rangkungan ring adiri, lanang utawi istri.

Palet 4

INDIK WARISAN MIWAH TETAMIAN

Pawos 74

1. Warisan inggih punika tatamian artha-brana saba ayah ayah ngupadi kasukertan skala niskala saking kaluhuranjaya majeng ring katurunannya.
2. Kang sinanggeh tetamian luire :
 - a. Druwe minakadi bangket miwah tegal, artha-brana, Kahyangan, Pusaka, Ciwakrama lan sane tiosan punika.
 - n. Katurunan (ahli waris).
 - c. Ayah-ayah miwah tategenan sane tiosan.

Pawos 75

1. Sang sane ngewaris luire :
 - a. Pratisantana purusa.
 - n. Pratisantana istri sane dados santana Rejeg.
 - c. Santana paperasan lanang.
2. Prade tan wenten sakadi ring ajeng, kang sinanggeh waris :
 - a. Turunan purusa pernah ngunggahang, rerama lanang, pekak, selanturipun rerama dimisan mindon.
 - n. Turunan purusa pernah kasamping makadi misan miwah mindon.
 - c. Turunan purusa pernah nedunang makadi kaponakan.

Pawos 76

Swadarmaning waris patut :

1. Narima saha ngutsahayang tetamian, pahan saking kaluhurannya makadi ngerempon sanggah, pura saha pangupakarannya miwah nyeledihin ayah-ayahan pawaris.
2. Ngabenang pawaris saha ngelanturang upacara-upakara pitra.
3. Nawurin hutang-hutang pawaris sane manut pangelokika.

Pawos 77

Pah-Pahan waris manut sakadi ring sor :

1. Risampun kalaksanayang pitra yadnya lan hutang-hutang pawaris buntas katawur.
2. Para waris polih pahan pada sangkaning pagunakayan, sajawaning karang ayahan Desa.
3. Sinalih tunggil waris kengin tan polih pahan prade :
 - a. Nilar kawitan lan sasananing Agama.
 - n. Alpaka guru rupaka, jantos kasadokang ring Prajuru/Dulun Desa tur kailikitayang.
 - c. Santana Rajeg kesah marabian miwah pratisantana nyeburin, sowang-sowang kabawos ninggal kadaton.
4. Boya waris kengin muponin olih-olihi manut dudonan luire :
 - a. Santana luh, salami durung kesah marabian utawi tan alpaka guru miwah prade madrebe pianak tan kangkenin antuk wong tua rare inucap, kengin ngawaris wantah pikolihi (pagunakayan) santana luh inucap kemawon.
 - n. Balu luh wiadin muani nyeburin (sowang-sowang boya santana).
 - c. Mulih Daha utawi Taruna, riantukan ring parabiane pecak sampun kabawos ninggal kadaton.
5. Pawaris kengin mapaweweh rikala mahurip pinaka jiwa dana, tadtadan utawi bekel, makacihna paweweh tetep ring pianak sane kesah marabian.

Pawos 78

1. Prade sajeroning pakulawargan wenten waris rangkungan ring adiri, patut :
 - a. Kawentenang paiguman indik padum waris inucap.
 - n. Yan tan prasida, katunasang tatimbang ring Prajuru/Dulun Desa (Kertha Desa).
 - c. Prade taler tan wenten cumpu ring panepas Kertha Desa punika, kengin katunasang ring Sang Mawarat.
2. Prade karang ayahan Desa kaputungan, karang inucap kadaut antuk Desa.

SARGA VI
WICARA LAN PAMIDANDA

Palet 1

INDIK WICARA

Pawos 79

1. Sane wenang mawosin makadi mutusang wicara ring Desa inggih punika : Prajuru/Dulun Desa sinaggeh Kertha Desa.
2. Prade sang mawicara tan wenten cumpu ring pamutus Kertha Desa, kengin nunasang wicara inucap ring Sang Mawarat.

Pawos 80.

1. Sahanan wicara mawiwit kacorahan sakaluire sinaggeh mamurug daging awig-awig, paswara miwah pararem Desa miwah Banjar. Prajuru/Dulun Desa patut digelis mawosin tan nyantos pasadok.
2. Sajaba wicara makadi ring ajeng patut nyantosang pasadok sang nunas bawos.
3. Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring catur dresta (sastra dresta, loka dresta, kuna dresta, desa dresta).

Palet 2

INDIK PAMIDANDA

Pawos 81

1. Desa miwah Banjar wenang niwakang pamidanda ring Krama sane sisip.
2. Paniwak inucap kalaksanayang olih Kelihan Desa miwah Kelihan Banjar.
3. Bacakan pamidanda luire :
 - a. Ayahan panukun kasisipan.
 - n. Danda artha (dosa danda saha panikel-panikelnya miwah panikel-panikel urunan).
 - c. Rarampagan.
 - r. Kadaut karang ayahannya.
 - k. Kasepekang.
 - d. Temah utawi Dewa Saksi.
 - s. Kanorayang.
4. Pamidanda sane katiwakang patut masor singgih manut ring kasisipan.
5. Jinah utawi artha-brana pamidanda ngeranjing dados druwen Desa miwah Banjar.
6. Yening wenten druwen Desa ical tan keni tut utawi tan keneng serep patut kakaryanang temah.

Pawos 82

1. Krama sane rangkung ring tigang paruman ngelantur tan nawur urunan miwah dadendan wenang karampag.
2. Rarampagan nganggen tata-cara kadi ring sor :
 - a. Kalaksanayang antuk Prajuru/Dulun Desa kasarengin antuk Krama tigang diri maka saksi.
 - n. Sang ngarampag sangkaning darsana ngambil barang utawi nyawenin tanem tuwuh, akehnya manut ring hutang sang karampag.
 - c. Prajuru/Dulun Desa miteketang mangda barang-barang sane karampag digelis katebus masenger tigang wuku, ring kalih likur (22) rahinane pacang kadol.
 - r. Tan ngeninin sakaluring barang sane patut inggilang manut agama miwah ngemademang pangupa jiwa sang karampag.

Pawos 83

1. Prade sang pacang karampag ngawara utawi mialang pamargine inucap, mawastu sampun tan nganutin Awig-Awig Desa, wenang karang ayahan Desa sane kagenahin kadaut antuk Desa.
2. Samalih yan purun taler ngalangin pamargine kadi ring ajeng, tan wenten pamargi malih sajawaning kasepekang antuk Krama Desane sami, tur wicaranya katur ring Sang Mawarat.
3. Pamidanda inucap ring ajeng, keni buntas risampun sang kakeninin :
 - a. Nunas geng pangampura ring Krama Desane riantukan nguak pasubayane nguni (pararem pecak).
 - n. Nawur pangangan panguak pasubayane duk pacang karampag kadulurin prayascita panyapsap kaiwangane ring Desa.

SARGA VII

NGUWAH-NGUWUHIN AWIG-AWIG

Pawos 84

1. Nguwah-nguwuhin Awig-awig puniki kalaksanayang antuk Paruman Krama Desa.
2. Awig-Awig puniki kamargiang ngawit kaingkupin (kararemin).

Pawos 85

1. Sakalawiring sane wenten sadurungnya patut kanutang ring sedaging Awig-Awig Puniki.
2. Sakaluwiring sane durung kabawos sajeroning Awig-awig puniki patut kalaksanayang manut tata cara sane sampun ketah marnagi kadulurin antuk pararem-pararem.

SARGA VIII

P E N U T U P

Pawos 86

1. Awig-awig puniki kararemin duk rahina Anggara Kliwon Dukut sasih Kalima Icaka warsa 1918 tanggal ping 15 (Purnama) tanggal masehi 26 Nopember 1996, ring Bale Agung Desa Adat Bugbug.
2. Awig-Awig puniki kalingga tanganin antuk Jero Bandesa, Kelihan Desa kasarengin antuk Kelihan-Kelihan Banjar, Pangajeng Krama Desa Adat Bugbug Purantara, saha kasaksinin antuk Kepala Desa Bugbug, Kepala-Kepala Dusun ring sawawengkoning wawidangan Desa Bugbug.
3. Luwir Sang ngalingga tanganin :

a. Kapertama : Prajuru/Dulun Desa :

1. Jero Bandesa Adat Bugbug,



(I Wawan Asih Arnaya)




Kepala Desa Adat Bugbug,



(I Wawan Mas Suyasa, SH.)

2. Kelihan Banjar Adat Puseh,






(I Wawan Sudharsana)




3. Kelihan Banjar Adat Bancingah,



(I Ketut Ardana)

4. Kelihan Banjar Adat Madya,






(I Nengah Dauh)




5. Kelihan Banjar Adat Darmalaksana



(I Nengah Suparta)

6. Kelihan Banjar Adat Segaa,






(I Nyoman Pageh)




7. Kelihan Banjar Adat Celuk Kangin



(I Wawan Wage)

8. Kelihan Banjar Adat Celuk Kangin,






(I Wawan Sederhana)



9. Kelihan Banjar Adat



(I Ketut Rina)

10. Kelihan Banjar Adat Baruna






(I Wawan Kisid)



11. Kelihan Banjar Adat Gariya



(I Nengah Marti)



Kelian Banjar Adat Samuh


(I Nengah Karina)



Pengajeng Krama Purantara

Denpasar

(I Wawan Tengah)



Pengajeng Krama Purantara

Singaraja

(Drs. I Nengah Sumardika)



Pengajeng Krama Purantara

Dauh

(I Nengah Dauh)

n. Kaping Kalih Kepala Dusun/Kepala Desa, maka saksi :



1. Kepala Dusun Bugbug Kaler

(I Nengah Suradnya)



2. Kepala Dusun Bugbug Kaleran

(I Syoman Putu Oka)



3. Kepala Dusun Bugbug Tengah

(I Ketut Selat)



4. Kepala Dusun Bugbug Tengahan

(I Nengah Cong Sujana)



5. Kepala Dusun Bugbug Kelod

(I Wawan Suji)



6. Kepala Dusun Bugbug Kelodan

(I Ketut Rinten)



7. Kepala Dusun Bugbug Samuh

(I Ketut Karang)



8. Kepala Desa Bugbug

(I Wawan Mas Suwasa, SH.)

9. Camat Karangasem

(Drs. I Nengah Sudhisa)

BUPATI MURDHA PAMIKUKUH :
BUPATI KEPALA DESA TINGKAT II KARANGASEM



(I KETUT MERTHA, S.sos.)

DAFTAR : PANITIA KECIL PENYUSUNAN / PENYEMPURNAAN
AWIG-AWIG DESA ADAT BUGBUG

KETUA : I NYOMAN DESA MAS
SEKRETARIS : I WAYAN TERANG PAWAKA
PEMBANTU-PEMBANTU : 1. I NENGAH MERTA
2. I NENGAH SUMARTA,BA
3. I NENGAH SURADNYA
4. I WAYAN SUJI
5. I KETUT ALIT
6. I NYOMAN PUNIA
7. I NYOMAN ALIT
8. I NYOMAN GEDE
9. I MADE KATONG
10. DRS. I WAYAN WIRNA
11. DRS. I NYOMAN IJIN
12. I KETUT PAGEH

HARI-HARI : PERAREM : 1. SENIN dan
2. REBO
3. MULAI : JAM : 19.00 S/d. 22.00 WITA.
4. TEMPAT DI KANTOR KEPALA DESA
BUGBUG.

BUGBUG, 14 JUNI 1988
KETUA,

(I NYOMAN DESA MAS)

N.B. DIMULAI TANGGAL 20 JUNI 1988.

CATATAN : KETUA KAGENTOSIN OLIH : I WAYAN MAS SUYASA,SH.

LAMPIRAN SK. Kelihan Desa Adat Bugbug, Nomor 04/Kep/KDA/1993, tanggal 26
 September 1993
 Tentang Pembentukan Tim Revisi Awig-Awig Desa Adat Bugbug.

NO.	N A M A	JABATAN DI DESA	JABATAN DALAM TIM
1.	I Wayan Asih Arnaya	Jero Bandesa Adat	Penasehat
2.	Drs. I Nengah Sumardika	Ketua Paruman Nayaka	Penasehat
3.	I Ketut Alit	Ketua Krama Desa Ngarep	Penasehat
4.	I Wayan Mas Suyasa, SH.	Kelihan Desa Adat	Penanggung Jawab
5.	Drs. I Wayan Wirna	Wkl. KDA. Bidang Pawongan	K e t u a
6.	I Wayan Terang Pawaka	Wkl. KDA. Bidang Parhyangan	Wakil Ketua
7.	I Wayan Merta C	Penyarikan Gede	Sekretaris
8.	I Nengah Sumartha, S.Pd.	Wakil. Ketua Paruman Nayaka	Wakil Sekretaris
9.	I Nengah Sudartha	Patengen Gede	Bendahara
10.	Drs. I Nyoman Ijin	Wakil Ketua Paruman Nayaka	Anggota
11.	Drs. I Ketut Pageh	Nayaka	Anggota
12.	Drs. I Nengah Sukarta	Ketua Komisi Nayaka	Anggota
13.	Drs. I Ketut Mertha	Nayaka	Anggota
14.	I Ketut Putu Oka, BA.	Ketua Komisi Nayaka	Anggota
15.	I Wayan Rena	Sekretaris Umum Nayaka	Anggota
16.	I Nyoman Sudiarta, BA.	Nayaka	Anggota
17.	Ir. I Wayan Tengah	Wakil Ketua Paruman Nayaka	Anggota
18.	I Wayan Seraya	Nayaka	Anggota
19.	I Nengah Kota	Nayaka	Anggota
20.	I Nengah Saria	Nayaka	Anggota
21.	I Nyoman Nik	Wakil KDA. Bidang Palemahan	Anggota
22.	I Nyoman Rauh	Penyarikan Nyoman	Anggota
23.	I Nengah Runyit	Petengen Nyoman	Anggota
24.	I Ketut Kasih	Penyarikan Nengah	Anggota
25.	I Wayan Suji	Penyarikan Wayan	Anggota
26.	I Nengah Karinu	Petengen Wayan	Anggota
27.	I Ketut Resi	Pangenter Daha Taruna	Anggota
28.	I Nyoman Pageh G.	Pangenter Palemahan	Anggota
29.	I Nengah Rai G	Nayaka	Anggota
30.	Drs. I Nym. Pt. Astawa	Tokoh Masyarakat	Anggota
31.	I Wayan Marti	Kelihan Banjar Garia	Anggota
32.	I Wayan Sudarsono	Kelihan Banjar Puseh	Anggota
33.	I Nyoman Kantor	Kelihan Banjar Bancingah	Anggota
34.	I Nengah Suji	Kelihan Banjar Baruna	Anggota
35.	I Nengah Dauh	Kelihan Banjar Madya	Anggota
36.	I Nengah Karinu B.	Kelihan Banjar Darmalaksana	Anggota
37.	I Wayan Merta	Kelihan Banjar Dukuh Tengah	Anggota
38.	I Nyoman Pageh	Kelihan Banjar Segaa	Anggota
39.	I Wayan Wage	Kelihan Banjar Celuk Kangin	Anggota
40.	I Wayan Sederhana	Kelihan Banjar Celuk Kauh	Anggota
41.	I Wayan Ripeng (+)	Kelihan Banjar Samuh	Anggota

LAMPIRAN : TEAM PENYEMPURNA : PENELITI AWIG-AWIG DESA ADAT
BUGBUG KABUPATEN DAERAH TINGKAT II KARANGASEM.


- I. PENASEHAT : 1. Bupati Kepala Daerah Tingkat II Karangasem.
2. Sekretaris Wilaya/Daerah Tingkat II Karangasem.
3. Kepala Kantor Departemen Agama Kabupaten Karangasem.
- II. KETUA : I WAYAN SUDIARTA,SH (Kepala Bagian Hukum
Setwilda Tingkat II Karangasem)
WAKIL KETUA : IDA BAGUS PIDADA ADNYANA (Ketua Parisada
Hindu Dharma Kabupaten Karangasem).
SEKRETARIS : I NENGAH RENGGEN,SH. (Ka.Sub.Bag.Bankum).
- III. ANGGOTA-ANGGOTA :
1. I Nengah Pasek, Sm.Hk.(BPPLA Kabupaten Karangasem).
 2. I Gst. Made Djatmika (Parisada Kabupaten Karangasem).
 3. I Ketut Bena (Staf Kantor Sospol Kabupaten Karangasem).
 4. Drs. I Wayan Suter (Staf Kantor Departemen Agama Kabupaten Karangasem).
 5. Drs. Ida Bagus Wayan Oke Diksa (Staf Kantor Departemen Agama Kabupaten Karangasem).
 6. I Gede Bendesa (Staf Kejaksaan Negeri Amlapura).
 7. I Made Suprata,SH. (Ka.Sub.Bag.Perun).
 8. I Dewa Putu Raka (Staf Polres Karangasem).
 9. I Gst. Lanang Jendra (Staf Kesra Setwilda Tingkat II Karangasem).
 10. Ida Bagus Ngurah SWD (Parisada Hindu Dharma Kabupaten Karangasem).
 11. Ida Bagus Ketut Tantra (Staf Pengadilan Negeri Amlapura).
 12. I Gede Semara (Ka.Sub.Bag.Dokum pada Bagian Hukum Setwilda Tingkat II Karangasem).
-


Amlapura, 23 Maret 1991

TEAM PENYEMPURNA/PENELITI AWIG-AWIG DESA ADAT BUGBUG
KABUPATEN DAERAH TINGKAT II KARANGASEM

KETUA

SEKRETARIS,


I WAYAN SUDIARTA,SH.


I NENGAH RENGGEN,SH.